

FPP

BizNewz

January - May 2024

MANAGEMENT • INVESTMENT • ECONOMICS • ENTREPRENEURSHIP • TECHNOLOGY

USEFUL
INFORMATION
IN CHOOSING
ROBO-ADVISORY

Muscle

Memory!

Bunga Raya,
BUKAN BUNGA BIASA.

Gold

SECRET
OF DARTS

SAVING: 999 @ 916

AKU, DIA
NICU SIRI 8



Publication Date
1 June 2024

MENJEJAKI KEINDAHAN GUNUNG BROMO: PENGALAMAN MEMUKAU DI TANAH JAWA

Nur Azwani Mohamad Azmin¹, Rosmaiza Abdul Ghani², Nurul Zakiah Zazli³

¹Fakulti Pengurusan dan Perniagaan, UiTM Cawangan Terengganu

²Fakulti Pengurusan dan Perniagaan, UiTM Cawangan Melaka

³Mercy Mission Malaysia

Emel Koresponden: nurazwani@uitm.edu.my



Indonesia, sebuah negara yang mampu menarik jutaan pelancong dari seluruh dunia dengan kepelbagaian alam semula jadi dan pemandangan yang menakjubkan. Di tengah-tengah keindahan alam yang menakjubkan ini, terletaklah Gunung Bromo, sebuah destinasi yang terkenal dengan kecantikan dan keunikan landskapnya. Saya bersama beberapa orang rakan telah memutuskan untuk mengembara ke Jawa Timur yang terletaklah Gunung Bromo sebagai destinasi pelancongan kali ini.

Perjalanan kami bermula dari Surabaya, ibu kota Jawa Timur, satu kota yang tidak pernah kami jejak di salah satu negara terbesar di Nusantara ini. Dari sana kami menaiki kenderaan dan perjalanan dari Surabaya ke kota Malang mengambil masa lebih kurang tiga jam. Selibanya di kota Malang yang terkenal dengan bandar pendidikan, menurut pemandu kami, di mana terdapat banyak universiti di bandar ini, kami mendaftar masuk ke hotel dan berehat sebelum meneruskan perjalanan ke gunung untuk menikmati keindahan pemandangan matahari terbit.

Tepat jam 12 tengah malam, kami bergerak melalui jalan raya berliku-liku menuju ke Bromo. Ketibaan kami disambut dengan udara yang sangat sejuk dan segar. Pendakian kami diteruskan dengan menaiki jip yang dipandu oleh pemandu yang handal dengan jalan berliku dan sempit. Seawal pukul empat pagi, kami tiba di Penanjakan untuk menunaikan solat subuh sebelum meneruskan pendakian untuk melihat matahari terbit. Perjalanan yang agak berliku dengan udara yang sejuk berjaya kami harungi, untuk menunggu matahari terbit di puncak setinggi 2,767 meter. Tapi sayangnya, disebabkan hari selepas hujan, pemandangan matahari terbit tidak dapat dilihat kerana diselubungi oleh awan dan kabus tebal. Sambil menunggu hari cerah, kami juga sempat menikmati kopo dan jagung manis sebelum menaiki jip turun menuju ke kaki gunung.

Seterusnya, kami meneruskan perjalanan ke Gunung Bromo. Gunung Bromo adalah salah sebuah gunung berapi dengan ketinggian 2,329 meter di atas permukaan laut yang masih aktif dan terkenal sebagai kawasan pelancongan di Jawa Timur.

Setelah sampai di kaki gunung Bromo dengan jip yang disewa, pelancong boleh mendaki gunung dengan berjalan kaki atau menaiki kuda dengan kadar bayaran IDR150,000 pergi balik. Kami memutuskan untuk berjalan kaki sahaja untuk mendaki gunung untuk melihat kawah. Kami menelusuri perjalanan yang berbukit dan menaiki 250 anak tangga untuk sampai ke puncak. Setelah beberapa kali berhenti untuk melepaskan lelah, akhirnya kami sampai ke puncak gunung Bromo. Pendakian berbukit yang memenatkan itu akhirnya membuahkan hasil di mana kami dapat melihat sendiri pemandangan yang sangat menakjubkan dan juga dapat melihat kawah gunung berapi yang masih aktif. Kami sangat mengagumi ciptaan Allah yang Maha Kuasa yang tiada di Malaysia. Betapa beruntungnya kami berpeluang menikmati pemandangan ini.

Di lereng puncak gunung, kedengaran bunyi di bahagian dalam kawah yang mengandungi sulfur dioksida atau belerang, menggelegak dengan kecerunan yang sangat berbahaya. Menurut pemandu pelancong kami yang dikenali sebagai Abi, belum ada kecelakaan yang berlaku setakat ini di puncak ini. Abi juga memaklumkan bahawa terdapat satu upacara tahunan yang melibatkan seluruh penduduk di kawasan Bromo, tanpa mengira anutan agama, membawa hasil tanaman ke kawah untuk dikorbankan. Ini adalah kerana mereka menganggap Gunung Bromo adalah gunung suci. Jumlah hasil tanaman yang dibawa adalah mengikut kemampuan masing-masing. Mereka akan mencampakkan hasil tanaman tersebut ke dalam kawah mengikut kepercayaan masing.

Walaupun perjalanan ke Bromo sangat berdebu, tapi tidak terasa jauhnya, kerana keindahan pemandangannya yang sangat luar biasa dengan udara yang dingin dan segar. Keputusan yang dibuat dalam masa yang sangat singkat bukanlah satu keputusan yang dikesali kerana kami dapat menikmati pengembaraan yang tidak pernah kami idamkan sebelum ini. Kami bercita-cita untuk kembali ke Malang untuk melawati tempat-tempat menarik yang tidak sempat dilawati pada kali ini. Semoga rezeki berpihak kepada kami pada masa akan datang.





BizNewz 2024
Faculty of Business and Management
Universiti Teknologi MARA Cawangan Terengganu, Kampus Dungun
Sura Hujung, 23000 Dungun, Terengganu, MALAYSIA
Tel: +609-8400400
Fax: +609-8403777
Email: biznewzuitm@gmail.com